

兩
浙
名
賢
錄

兩浙名賢錄卷三十二目次

德業

漢

合浦太守孟伯周嘗

晉

會稽內史孔敬康倫

子閭附

宋齊梁陳

南充州刺史陸叔明慧曉

子僚任附

尚書左丞沈曇慶

吏部尚書沈臺真演之

附父

唐

饒州刺史張君選無擇 史館修撰徐處仁岱

宋

國子祭酒姚輝中勳 靈壽令唐浙師翊

太子賓客謝濟之濟 戶部侍郎虞純臣奕

龍圖學士傅國華墨卿 安撫使汪仲嘉大猷

司封郎田伯清渭 中書舍人徐明可敷言

給事中王誠之信 起居舍人薛德老徽言

太常丞喻叔奇良能

父葆光兄良猗附

監察御史喬世用 禮部尚書劉文儒章

安撫使劉師文甲 舒州通判沈叔晦煥

少傅趙悅道與樞 戶部郎中黃子暘 夢暘

知台州王致遠 參知政事常長孺林

太常少卿孫元實子秀 刑部右侍郎黃元章 黼

元

上虞令林希元

明一

監察御史張尹誠純誠 監察御史何同

蓬州知州金士琬紘

左副都御史夏廷簡迪

江西按察僉事馮本清

禮部左侍郎章尚文啟

副都御史王景陽暹

兵部左侍郎鄭文樞辰

刑部主事管原理思易

鞏昌知府戴彥廣浩

子楨附

湖廣參議周宗武文

湖廣巡撫蔡廷子錫

禮部郎中蔣廷暉暉

曾祖鑑子宏附

安福簿詹景威

右副都御史盧仲思膚

刑部尚書陸廷玉瑜

刑部尚書薛廷器希璉

副都御史朱廷璧瑄

刑部右侍郎金縉卿紳

順天府尹魯茂功崇志

董如魯慧

都御史夏宗成瑱

太僕寺少卿章用輝瑄

貴州布政使唐質夫彬

工部侍郎李時升堂

兩浙名賢錄卷三十二目次終

續業目次

卷之三十二

三

光碧堂

兩浙名賢錄卷之三十二

東海徐象梅仲和氏謨

武原陳昌懋仲修氏閎

德業

漢 凡一人

合浦太守孟伯周嘗

孟嘗字伯周，會稽上虞人也。少修操行，仕郡爲戶曹史。上虞有寡婦，至孝養姑。姑年老壽終，夫女弟先懷嫌忌，乃誣婦厭苦供養，加鴆其母，列訟縣庭。郡不加察，遂結

竟其罪。嘗先知枉狀。備言之太守。太守不爲理。嘗哀泣門外。因謝病去。婦竟冤死。自是郡中連旱三年。禱請無所獲。後太守殷丹到官。訪問其故。嘗詣府具陳。寡婦冤誣之事。因曰。昔東海孝婦。感天致旱。于公一言甘澤。時降。宜修訟者。以謝冤魂。底幽枉。獲伸時雨。可期。丹從之。卽刑訟女。而祭婦墓。天應澍雨。穀稼以登。嘗後舉孝廉。茂才。拜徐令。州郡表其能。遷合浦太守。郡不產穀。實而海出珠寶。與交趾比境。常通商販。買糴糧食。先時宰守並多貪穢。詭人採求。不知紀極。珠遂漸徙於交趾。郡界

於是行旅不至。人物無資。貧者死餓於道。嘗到官。革易前政。求民病利。曾未踰歲。去珠復還。百姓皆復其業。商貨流通。稱爲神明。以病自上。被徵當還。吏民攀車請之。嘗旣不得進。乃載鄉民船。夜遁去。隱處窮澤。身自畊傭。隣縣士民慕其德。就居止者百餘家。桓帝時。尚書同郡楊喬上書薦嘗曰。臣前後七表言故合浦太守孟嘗而身輕言微。終不蒙察。區區破心。徒然而已。嘗安仁弘義。耽樂道德。清行出俗。能幹絕羣。前更守宰。移風改政。去珠復還。飢民蒙活。且南海多珍。財產易積。掌握之內。價

盈兼金而嘗卑身謝病躬耕壟次匿景藏采不揚華藻
實羽翮之美用非徒腹背之毛也而沈淪草莽好爵莫
及廊廟之寶弃於溝渠且年歲有訖桑榆行盡而忠貞
之節永謝聖時臣誠傷心私用流涕夫物以遠至爲珍
士以希見爲貴槃木朽株爲萬乘用者左右爲之容耳
王者取士宜拔衆之所貴臣以斗筭之姿趨日月之側
思立微節不敢苟私鄉曲竊感會息亡身進賢嘗竟不
見用年七十卒於家

會稽內史孔敬康愉 子問附

孔愉字敬康，會稽山陰人也。年十三而孤，養祖母以孝聞。與同郡張茂字儁康、丁渾字世康齊名，時人號曰「會稽三康」。吳亡，愉遷於洛。惠帝末，歸至江淮，遇石冰封雲爲亂，雲逼愉爲參軍，不從。幾爲所殺，東還。會稽入新安山中，改姓孫氏，以稼穡讀書爲務，信著鄉里。後忽捨去，皆以爲神人而爲之立祠。建興初，始出應召，爲丞相掾。時年已五十矣，以討華軼功，封餘不亭侯。初，愉嘗行經餘不亭，見籠龜於路者，愉買而放之。溪中龜中流，左顧。

者數四。及是鑄侯印而印龜左顧三鑄如初。印工以告。愉乃悟。遂佩焉。遷侍中太常。蘇峻反。愉朝服守宗廟。初。愉爲司徒長史。以平兩將軍溫嶠。毋亡遭亂不葬。乃不遺其品。至是峻平而嶠有重功。愉往石頭詣嶠。嶠執愉手而流涕曰。天下喪亂。忠孝道廢。能持古人之節。歲寒不凋者。惟君一人耳。時人咸稱嶠居公而重愉之守正。三遷尚書左僕射。以議論持正爲王導所嗾。出爲會稽內史。加散騎常侍。句章縣有漢時舊陂。毀廢數百年。愉自巡行。修復故堰。溉田二百餘頃。皆成良業。在郡三年。

乃營山陰湖南侯山下數畝地爲宅草屋數間便棄官
居之送資數百萬悉無所取病篤遺令飲以時服鄉邑
義聞一不得受年七十五卒贈車騎將軍開府儀同三
司謚曰貞三子閻汪安國閻嗣爵位至建安太守汪安
國自有傳

宋齊梁陳

共六人

南兖州刺史陸叔明慧曉

子僚任附

陸慧曉字叔明玩之玄孫也自玩至慧曉祖萬載世爲
侍中皆有名行時人方之金張二族慧曉清介正立不

雜交游會稽內史張緒稱爲江東裴樂齊建元初歷官太子洗馬廬江何點常稱慧曉心如照鏡遇形觸物無不朗然慧曉與張融並宅其間有池池上有二株柳點歎曰此池便是醴泉此木便是交讓及武陵王曄守會稽上爲精選僚吏以慧曉爲征虜功曹與府參軍沛國劉璉同從述職璉清介士也行至吳謂人曰吾聞張融與慧曉並宅其間有水必有異味故命駕往酌而飲之曰飲此水則鄙吝之萌盡矣其爲名流賞矚如此廬陵王子卿爲南豫州刺史帝稱其小名謂司徒竟陵王子

良曰。烏熊痴如熊。不得天下第一。人爲行事。無以壓一州。旣而曰。吾思得人矣。乃使慧曉爲長史行事。別帝問曰。卿何以輔持廬陵。答曰。靜以修身。儉以養性。靜則人不擾。儉則人不煩。上大悅。慧曉歷輔五政。立身清肅。僚佐以下造詣。必起送之。或謂慧曉曰。長史貴重。不宜妄自謙屈。答曰。我性惡人無禮。不容不以禮處人。終身未嘗卿士大夫。或問其故。慧曉曰。貴者不可卿。而賤者乃可卿。人生何容止。輕重於懷抱。俄徵黃門郎。遷吏部尚書。曹郎令史。歷政來諮執選事。慧曉任已獨行。未嘗與

語帝遣主簿謂曰都令史諳悉舊貫可共參懷慧曉曰六十之年不復能諮都令史爲吏部郎也上若謂身不堪便當拂衣而退帝甚憚之後以侍中出爲南充州刺史加督以疾卒贈太常三子僚任倅並有英名時人謂之三陸僚學涉經史長於微言美姿容鬚眉如画位西昌侯長史蜀郡太守任御史中丞倅自有傳

尚書左丞沈曇慶

沈曇慶武康人懷文之從兄也仕宋位尚書右丞時歲有水旱曇慶上書請立常平倉儲粟以賑人急文帝納

之。曇慶性謹實。清正歷仕。有稱績實。語子弟曰。吾處世無寸能。圖作大老子耳。當世稱爲長者。

吏部尚書沈臺真演之

父叔任附

沈演之字臺真。吳興武康人也。父叔任以平蜀功封寧新縣男。後拜益州刺史。卒。沈氏家世爲將。而演之折節讀書。以義理業尚知名。襲父別爵。吉陽縣五等侯。舉秀才爲嘉興令。有能名。元嘉中。累遷尚書吏部郎。先是劉湛、劉斌等結黨。欲排廢尚書僕射殷景仁。演之雅杖正義。與景仁盡心朝廷。文帝甚嘉之。及彭城王義康出藩。

誅劉湛等以演之爲右衛將軍與左衛范曄對掌禁旅
同參機密尋加侍中文帝謂之曰侍中領衛望實優顯
此蓋宰相便坐卿其勉之上欲伐林邑朝臣議多異同
惟演之贊成上意及林邑平頒賜羣臣惟演之所得餉
多上謂曰廟堂之謀卿參其力乎此遠夷未足多建業
土鄴清舊都鳴鳶東岱不憂河山之不開也未幾遷中
領軍太子詹事范曄懷逆謀演之覺其有異言之文帝
曄尋伏誅歷位吏部尚書太子右衛率素有心氣寢病
歷年上使卧疾理事性好舉才申濟屈滯而謙約自持

上賜女伎不受。暴卒，贈金紫光祿大夫，謚曰貞。

唐 共二人

饒州刺史張君選無擇

張無擇字君選，慈谿人。永隆初，由進士舉明經，調醴泉尉，改汴州叅軍。會李敬業起兵討武后，無擇謂敬業其志雖壯而其事不可爲訓，乃從李孝逸拒敬業。贊畫有功，遷華陰令。屬羅織獄起，無擇每以恤民爲己任，未嘗私附朋黨。民賴以寧，召爲司刑丞。適魏元忠與張昌宗廷辯獲罪，無擇上疏申理元忠之枉，張易之不快其剛。

直謫嶺表移饒州刺史父母相繼歿負土結廬三年石櫛人稱其孝

史館修撰徐處仁岱

徐岱字處仁嘉興人學無所不通大曆中劉晏表爲校書郎觀察使李栖筠賢之表所居爲復禮鄉貞元初爲太子諸王侍讀留給事中史館修撰性篤慎不談人短宗族孤孺皆爲婚嫁儉約一身以行其德彌老不衰至今人能道之

宋

共三十三人

國子祭酒姚輝中勛

姚勛字輝中，山陰人。舉進士，歷永康令。元祐中，召爲左正言，奏御史中丞趙君錫雷同俯仰，無所建明，累遷寶謨閣待制，國子祭酒。知明州，紹聖初，言者論其阿附呂大防范純仁，謫知信州，再貶水部員外郎，分司南京。卒，勛兩遭廢斥，不以遷謫自解，盡心民事，所至俱有聲績。尤以孝行著稱，每省先墓，素衣步出城門，且行且涕，至墓哀慟如初喪，見者爲之感動。

靈壽令唐浙師翊

唐翊字浙師山陰人世以儒術顯翊生甫七齡日誦千言十三能屬文稱奇童元祐間人士競工詞章翊堅守經術卒以兩經中第主蘄縣簿吏以其初筮少之翊稍露鋒鐔吏更畏服不敢欺徙知靈壽值大旱翊開渠溉田數千頃旁渠之田不用而稔常平吏盜倉粟翊發其奸以能例得遷秩乃歎曰置人於重辟而已受賞可乎乃改從自首律後屢典州郡曹所至皆有聲同時陸佃輩皆推服焉

太子賓客謝濟之濟

謝濤字濟之富陽人以文學稱登淳化三年第爲梓州
推鹽判官李順反成都濤畫計守禦以功遷觀察推官
權知華陽縣亂後田廬荒廢詔有能占田而倍入租者
與之於是腴田悉爲豪右所占流民至無所歸濤收詔
書悉以田還主改著作佐郎知興國軍真宗考吏籍內
出朝士有治迹者二十四人名副中書省濤在選中召
對長春殿賜五品服契丹入寇議親征以濤知曹州屬
縣賦稅多輸睢陽助兵食是歲霖潦百姓苦轉送濤請
以他漕過睢陽者取以餉軍留曹賦繇廣濟河以饋京

師詔從之。嘗使蜀還。舉所部官三十餘人。宰相疑其多。濤乃陳諸吏治狀。且曰。有罪願連坐。奉使舉人連坐。自濤始。久之。召試。以尚書兵部員外郎直史館。遂兼侍御史。真宗山陵。靈駕所經道路。有司請悉壞城門廬舍。以過車輿象物。濤言。先帝車駕封祀。儀物大備。猶不聞有所毀撤。且遺詔從儉。薄今有司。治明器。侈大以勞州縣。非先帝意願。下少府裁損之。進直昭文館。累官太子賓客。卒。范仲淹稱濤清淨而文。出入朝廷三十年。語默仁義。進止於青雲之衢。徐徐如也。歐陽修銘其德。納諸富。

陽之原子絳自有傳

戶部侍郎虞純臣奕

虞奕字純臣錢唐人元豐八年進士崇寧中提舉河北西路常平洛相飢徙東路入對上問行期對曰臣退卽行流民不以時復則來歲畊桑廢矣上悅西部盜起徙提刑自請討賊悉降之人爲開封府少尹故時開封治獄得請寶赦罪其後悉任情弃法奕言廷尉持天下平京師諸夏本法且不行何以示萬國請自今非情法實不相當毋得輒請寶從之遷戶部侍郎內侍總領左藏

予奪自顯視戶部如僚屬。奕白宰相曰：計臣不才，當去之，而易能者，不可使他人侵其官。卽自劾，不稱職，詔爲罷內侍之領左藏者，卒，贈龍圖閣學士。

龍圖閣學士傅國華墨卿

傅墨卿字國華，山陰人。以大父恩補太廟齋郎，歷翰林學士。宣和中以禮部尚書持節冊立高麗王，楷有功，還賜同進士出身，進龍圖閣學士，以守正大夫致仕。墨卿凡三使高麗，所過郡縣輒爲守令道上德意，以寬有爲務。罪囚及當死者，多得減釋。官吏有責罰，編置亦貸除。

之高麗至今廟祀之不絕初墨卿尉江都往來山陽滌
爲節孝處士徐積所知人問積所爲知墨卿者積曰方
欽聖升遐楚之官吏賓客皆易服臨郡庭下惟傳尉容
稱其服吾是以賢之

安撫使汪仲嘉大猷

汪大猷字仲嘉鄞人年四歲對客誦孝經止十七章客
問十八章何以不誦以具慶對客大奇之以父恩補官
授江山尉舉進士改金華丞歷遷大宗丞兼吏部郎莊
文太子初建東宮兼太子諭德每侍講多寓規戒太子

嘗出龍大淵禁中所進侍燕樂章諭官僚同賦大猷曰
鄭衛之音非講讀官所與聞也遷秘書少監給事中孝
宗清燕每訪政事大猷遂陳賜田勲戚豪奪相先陵轢
州縣惟當賜金使自求之又論沒入資產止可行於強
盜賊吏至於倉庫綱運之負陷者惟當卽其業收租以
償旣足則給還使復故業嘗與廷臣論強盜有犯止宜
用六項法上聽之旣而大猷使金仍用舊法大猷還朝
自劾求去卒從其議改樞吏部侍郎以言去起知泉州
故事蕃商與人爭鬭非折傷皆以牛贖大猷曰安有卜

國用島夷俗者苟在吾境當用吾法三佛齊請鑄銅瓦
三萬詔守臣督造付之大猷奏法銅瓦不下海中國方
禁銷銅奈何爲小夷所役卒不與進敷文閣直學士擢
江西安撫使卒贈二官大猷與丞相史浩同里又同年
進士未嘗附麗于進浩深歎美之好周施敘內外族爲
興仁錄率鄉人爲義莊割田以倡所著有適齋存稿備
忘訓鑒等書

司封郎田伯清渭

田渭字伯清縉雲人初官辰州教授五溪俗與中國殊

絕渭朔學宮刻典籍立程度推訓育俗爲一變召爲司
封郎在朝八年。庶靖自持故舊多要路耻私附以干進
士論重之除浙東提舉常平歲歉究心荒政轉徙者來
復除台處娶三州戶科茶稅又奏罷五等差夫送迎之
擾民賴以安著有朋雲刀筆璽齋集若干卷

中書舍人徐明可敷言

徐敷言字明可西安人泌之孫也第進士入爲九域志
編修官召對稱旨校書秘省擢御史覆李孝壽所劾衛
卒獄在廷稱其平未幾除江東運判番陽民吳氏館客

誘其子書不順字持以告并誣其藏甲朝命置獄數言
辨其妄吳賴以全俄與同列奏事異同下遷兩官謫監
富順鹽井朝廷知其非辜召爲吏部員外見執政首爲
同列者辯時稱長者擢中書舍人有從臣以墨廢遇赦
遽復原官數言傲之堂吏遷謫刺袖以還宰相又言比
舉自代皆爲虛文乞籍記以備擢用詔立法在掖垣七
年以寵制守越奏罷貢奉物移守婺有惠政召至國門
卒所著有易說及二五君臣論篤愛諸弟當任子先補
從子琮

給事中王誠之信

王信字誠之，麗水人。舉紹興進士第，調溫州教授。會郡飢，疫以賑救爲已任，召爲勅令所刪定官書成，進上。比資格實歷四考，纔少十二日，或謂盍少遲。信曰：遲之爲利，是欺君也。上語宰相曰：信在勅局久，當序遷。宰相以未嘗見其求遷對，上曰：不求遷，乃見其賢耳。遂擢考功郎。宰相以三蜀士囑信不可宰相服其有守。因奏曰：近日銓曹之清信之力也。有軍官賂吏，僞爲磨勘，陰薦信。察其姦，白都堂付之理，吏無所容。共禱於神，願信徙他。

曹無爲考功官。上聞之喜曰：「一郎官乃能爲朕任怨除中書舍人，遷給事中，前後論事忠讜，上屢呼其官而不名，出知紹興府，奏免積逋以百萬計，開山陰淳甯注之海，民德之。歌曰：『湖水溢大田，失湖可耕，民以生。』名之曰王公湖，置義田活民，之不舉子者，創義廩資民，之無以葬者，嘗使北，肄射破的，再發仍中，金人驚曰：『得非黑王相公子孫邪？』謂其善射，侔武恭公德用也。制誥得古體字，逼米元章。賦揚州后土祠瓊花詩，掩唐宋衆作，有是齋文集若干卷。」

起居舍人薛德老徽言

薛徽言字德老溫州人登進士第爲樞密院計議官以
監察御史宜諭湖南時郴道桂陽旱飢徽言請於朝不
待報卽諭漕臣發衡永米以賑而以經制銀市米償之
所刺舉二十人使還他使皆進擢宰相呂頤浩以徽言
擅易守臣而移用經制銀出知興國軍入爲郎遷右司
擢起居舍人時秦檜與金人議和徽言與吏部侍郎吳
敦復等七人同拜疏爭之一日檜於上前論和徽言直
前引義固爭反覆數刻中寒疾而卒高宗念之賻絹百

王特與遺表恩

太常丞喻叔奇良能

父葆光兄良倚附

喻良能字叔奇義烏人父葆光娶黃氏睦寇起青溪婦翁以白金數千兩屬葆光窖藏之盜平婦翁亦死三子俱幼莫知金所寓葆光舉而歸之三子請奉數百金爲謝葆光力辭弗受人稱長者黃氏脫簪珥買書延師教其五子皆有成立良能與兄良倚同入太學又同年舉進士初補廣德尉二獲強盜應賞格辭不受調番陽丞遷國子監主簿進忠義傳起戰國王蠲止五代孫晟通

一百九十人乞頒之武學校之將帥孝宗嘉歎顧侍臣
曰喻良能質實平正書其名於屏間內艱服除以國子
博士召兼工部郎官除太常丞兼舊職請外知處州尋
奉祠而歸以朝請大夫義烏縣開國男食邑三百戶致
仕鄉人慕其名立石表其地曰郎官里兄良倚字伯壽
卒官臨海丞

監察御史喬世用夢符

喬夢符字世用東陽人從呂祖謙學嘗作不欺論諫奇
之登淳熙進士第知徽州歙縣有大達當水衝居人歲

苦霖潦。夢符爲築堤鑿渠。人免水患。號喬公。徙守潮陽。民稱。豈弟宰相。薦士十九人。而夢符爲首。改與六院差遣。尋除大理正。奉旨卽訊郭倬獄於宿州。不畏權勢。獄具。除監察御史。卒。所著有西規類稿。

禮部尚書劉文孺章

劉章字文孺。旌游人四冠鄉舉。紹興十五年廷對第一。歷官秘書郎。兼管安恩平兩上府教授。竭忠輔導。受知孝宗。自此始。泰檜嫌其不附已。出知筠州。檜死。召爲司封員外郎。歷遷工部侍郎。兼侍講。論罷提舉崇道觀。孝

宗受禪念舊學召拜禮部侍郎奏禁遏淫祀仍於三朝
史中刪去道釋符瑞志大略以爲非春秋法朝廷議經
略中原調諸郡兵民頗擾少卿趙彥端指言非是或譖
彥端曰陛下寃心大舉凡所圖回但資趙彥端一笑爾
彥端懼不測上因夜對問章曰聞卿監中有笑朕者章
不知狀從容對曰聖主所爲人焉敢笑若議論不同或
者有之上意頗解彥端獲免人稱章長者進樞禮部尚
書給事中對選德殿問章今年幾而容貌未衰頗嘗學
道否章拱對曰臣書生無他長惟非儉自晏嬰一狐

表三十年不易人、以爲難、臣以爲易、上嘉歎久之、章力告老、以顯謨閣學士奉祠、卒年八十、贈光祿大夫、謚曰文靖、章容貌魁碩、以周密自守、出入兩朝、被顧遇、未嘗泄禁中一語、世以比漢孔光

安撫使劉師文甲

劉甲字師文、龍游人、淳熙二年進士、歷官寶謨閣待制、知江陵府、湖北安撫使、甲謂荊州爲吳蜀脊、高保融分江流滯之、以爲北海、太祖令決去之、蓋保江陵之要害也、卽因遺址浚築、亘四十里、移知廬州、改知興元府、利

東安撫使吳曦之叛，遣將趙觀以書致甲，甲援大義拒之。因卧疾，乃援顏真卿河北故事，欲自叛歸朝。先募二兵持帛書，遣知事李璧告變。且曰：「若遣吳總以右職入川，卽日可瓦解矣。」曦僭王，遂去官。朝廷久乃微聞曦反狀。韓侂胄猶以爲不然。及甲奏至，舉朝震駭。璧以甲帛書進，上覽之，誦忠臣者再。召甲赴行在，命吳總以雜學士知鄂州。多賜書，身金錢，使招諭諸軍，爲入蜀計。甲所行至重慶，聞安丙等誅曦，復還漢中。上奏待罪，詔趣還任，列上叛臣子孫族屬及附僞罪狀。公論快之。上念

甲精忠拜寶謨閣學士、賜衣帶鞍馬、知興元府、利路安撫使。先是大臣撫蜀者、諸將事之、有所謂互送禮、實賄賂也。甲下令首罷之。凡丙增多田稅。甲命屬吏討論。由一府計歲減錢百六十萬緡、米麥萬七千石、邊民感泣。嘉定七年卒於官。年七十三。甲幼孤多難、母病刲腹以進。生平常謂吾無他長、惟足履實地、晝所爲夜必書之。名曰自監、爲文平澹、有奏議十卷。理宗詔謚清惠。

舒州通判沈叔晦煥

沈煥字叔晦、定海人。舉乾道五年進士、授餘姚尉、揚州

教授召爲太學錄以所躬行者淑諸人蚤暮延見學者孜孜誘誨長貳同僚忌其立異會克殿試考官唱名且序立庭下帝偉其儀觀遣內侍問姓名衆滋忌之或勸其姑營職道未可行也煥曰道與職有二乎適私試發策引孟子立乎人之本朝而道不行耻也言路以爲誦已請黜之在職纔八十日調高郵軍教授而去後克幹辦浙東安撫司公事高宗山陵百司次舍供帳酒食之需供給不暇煥急言於安撫使鄭汝諧曰國有大威而臣子宴樂自如安乎汝諧屬煥條奏煥曰且移書御史

請明示喪紀本意使貴近哀戚之心重則菱舍非食自
安不煩彈劾而需索絕矣於是治並緣爲姦者追償率
歛者支費頗減歲旱常平使分擇官屬賑恤得上餘餘
姚二縣無復流殍改知婺源三省彙薦書以聞遂通判
舒州閒居雖病猶不廢讀書拳拳然以母老爲念善類
凋零爲憂卒丞相周必大聞之曰追思立朝不能推賢
揚善予媿叔晦益者三友叔晦不予媿也煥人品高明
而其中未安不苟自恕常日晝觀諸妻子夜卜諸夢寐
兩者無媿始可以言學追贈直文華閣特謚端獻

少傅趙悅道與惟

道與惟字悅道慈懿王八世孫南渡家於鄞遂爲鄞人
嘉定七年進士調會稽尉歷官右部惟歷久以直寶章
閣知安吉州郡計仰惟酷禁網峻密與惟首相以予民
設銅鉦縣門欲慙者擊之寃無不直母喪屢起之不可
再期以刑部郎官召乞終禪奉祠復半載乃趨朝遷宗
正少卿兼戶部侍郎知臨安府浙西安撫使同詳定劄
決明暢罪者咸服郊祀風雷與惟上言國本未定又陳
弭盜固本之策嘉熙改元襄蜀殘破或望風棄地召見

便殿具言防邊之道。又言禁衛虛籍及京口諸郡悉宜募兵。統以郡將。財先贍軍。餘始上供。遂招刺三千人爲忠毅軍。以嚴宿衛。薦文武士四十人以備銓擇。遷戶部侍郎。兼樞兵部尚書。星變。上章請罷。謂臣罪擢髮難數。猶欲以去國爲言。少悟上聽。願祇天威。以實德及民。始自上躬。痛加節約。廣推賑恤。五請竄。不允。於是中書方大琮言與惟素自潔修。疏財輕爵。人所共知。不幸遇此。觀其待罪之章。懇切至到。未嘗不歎其知義也。乞俞所請。使小大之臣皆知引咎。乃收一階。尋復之。與惟請先

敘復同降官屬又累丐祠不許時論楮幣又欲以端平錢當五行使與惟謂開禧嘗以二當三何救於楮且曰士大夫不清白奉法愴意扶持雖日易一法無救於弊而國非其國矣要在別邪正警偷惰獎用恬退質直之士以絕躁競浮靡之習清心寡欲以革酣歌黷貨之風其機皆自陛下始力求歸田會潮汐嚙隄執政道帝意留之與惟奉朝請出關遣使趣還時飢民相携溺死帝仍付臨安府事恩例視執政與惟涕泣受詔亟榜諭曰今申奏振恤毋急死須臾各全性命佇沐聖恩都人相

謂毋死曰趙端明必有以活我與惟上則所請公朝下
則推誠勅分甘雨隨至米商四集流移至者有以濟之
力求納祿授資政殿學士提舉萬壽觀奉朝請與惟至
浙江上召還卽日絕江去帝爲悵然與惟三爲府尹盡
力民事都人稱趙端明必以手加額曰趙佛子也久之
以待讀召對言爵祿之濫因及國本事在經筵言今日
國勢如以壞症付庸醫徒運巧心僅支殘喘天下事豈
堪再誤耶時相忌而出之帝書安貧樂道植節秉忠八
字賜之又賜泰卦詩忠邪辨拜少傅不起卒遺表猶不

忘規正贈少師追封奉化郡王謚清敏累贈太師與惟
嘗謂士大夫有貪聲則雖奇才與學徒以蠹國害民故
歛之夕金帶猶質錢民家云

戶部郎黃子暘夢炎

黃夢炎字子暘義烏人博學善文登淳祐進士第辟荆
湖制幕以掌故準備差遣平反盜庫銀冤獄得釋者數
十百人入淮東制幕主管機宜文字建議觸放屯租邊
民賴以安業出判平江府撙節浮姦以代民輸租白免
淮西總領累歲所索無名錢民力以甦咸淳初除司農

寺丞輪對力陳時弊請減浮費乞戒宴私度宗嘉納除
樞密院編修官累遷戶部左曹郎官仍兼編修與時宰
不合引年以歸扁所居曰桂隱

知台州王致遠

王致遠永嘉人以父任歷知慈谿縣嘉熙庚子浙東大
飢死殍成丘致遠請邑賢士大夫分僧寺置局爲粥以
食餓者始日食千人旣而隣民至日至八千人已俸
不足復詣臺借助勸巨室出米以續之迨麥熟始罷尋
置居養院給薪米以處老弱之無歸者置慈幼院厚乳

哺以活嬰孩之委弃者病與醫藥死爲歛埋山谷窮民
感恩流涕稱爲王佛肖像祠之累遷湖北提刑改浙東
知台州召爲吏部不赴居鄉十年創永嘉書院建青藤
閣祀周許二劉鮑五先生朔望序拜講說復捐已地建
義倉扁曰思稷平糴以利民鄉間德之

參知政事常長孺

常孺字長孺顯謨閣直學士同之曾孫淳祐七年進士
調常熟尉遷婺州推官疏決滯訟以剽繁裁劇稱辟差
平江府百萬倉檢察不受和糴事例徙監江淮茶鹽所

蕪湖局不受商稅。竊改知嘉定縣。以特薦除簽書臨安府判官。主管城南廂聽訟。嚴明豪右。憚之。改知廣德軍。郡有水災。發社倉粟以活飢民。官吏難之。林先發而後請專命之罪。故事。郡守秋苗例可得米千石。迺以代屬縣償。大農網欠。拜監察御史。首論買似道爭田事。又論皇子竑當繼其嗣。觸度宗怒。遷司農卿。尋爲兩浙轉運使。禁戢吏奸。不以急符督常賦。海鹽歲爲鹹潮害稼。林請於朝。捐金發粟復輟已帑。大加修築。新塘三千六百二十五丈。名曰海晏塘。是秋風濤大作。塘不浸者尺許。

民得莫居。歲役告稔。邑人德之。遷刑部侍郎。首論雷雪非時之變。以集賢殿學士出知平江。值旱。故事。郡守合得緡錢十五萬。悉以爲民食軍餉。助蠲苗九萬。稅十三萬。版帳十六萬。又蠲新苗二萬八千。大寬公私之力。飛蝗幾及境。疾風颳入太湖。旣代。有送還事例。自給吏卒外。餘金萬楮。憐悉不受。吏驚曰。人言常侍郎不愛錢。果然。改浙東安撫使。值水災。捐萬楮以振之。復請糴於朝。得米萬石。蠲新苗三萬八千。又以諸暨被水尤甚。給二萬楮付縣折運。民食不至乏絕。兩浙及會稽山陰死者。

暴露與貧而無以爲殮者。廼以十萬指置普惠庫。取息造棺以給之。尋以刑部侍郎召平。反全活者甚衆。兼給事中。封還隆國夫人從子黃帝怒賈似道以御書令委曲行。楸迄不奉命。以寶章閣待制提舉太平興國宮。德祐元年。拜吏部尚書。首言雪川之變。非濟邸本心。置之死地過矣。不與立。後又過矣。巴陵帝王之胄。生不正命。死不得血食。沈寃幽憤。鬱結四五十年之久。不爲妖爲。扎於冥冥中者幾希。願陛下勿掇浮議。特發神斷。宗社幸甚。於是詔國史院討論典故。以開明堂禮成進端明。

殿學士提領戶部財用特與執政恩數。林以國步方艱。非臣子貪榮之時。力辭恩數。與廟堂議事不合。以疾謁告。二年春拜參知政事卒。

太常少卿孫元寶子秀

孫子秀字元寶。餘姚人。以進士主吳縣簿。有稱水仙太保爲妖者。子秀毀其像。沉其人於太湖。淮東總領檄子秀督宜興縣團田租。還白水災。總領恚曰。此軍餉所關。乃敢爾。子秀堅持之。是年卒。免稅。令金壇縣稻最遷通。判慶元府。主管浙東塩事。奏蠲五鹽。塩之困民者。衢州

寇作擇子秀往守賊悉就擒奏蠲秋苗萬五千石又奏
改廢寺爲孔子家廟於衢如關里遷金部郎左司兼右
時丁大全攻去丞相董槐謀代之三學諸生伏闕上書
十上不得聞子秀從二府就檢院取書徑徹榻前大全
怒逐之尋起爲浙西提舉改提刑兼知婺州婺勢家多
匿田隱稅子秀操之急勢家嗾言者劾罷之尋遷浙西
提刑進太常少卿知臨安府以言罷復知婺州卒子秀
性沈毅遇事慷慨敢爲抵掌劇談神采飛動與人交从
而益親死生患難營救不遺餘力聞一善輒手記之喜

獎拔後進有古人之風

刑部右侍郎黃元章黼

黃黼字元章餘杭人第進士累官太常博士輪對言周以輔翼之臣出任方伯漢以牧守之最擢拜公卿唐不歷邊不拜宰相本朝不爲三司等屬不爲清望官仁宗時韓琦范仲淹龐籍皆嘗經略西事久歷邊任始除執政邊奏復警范仲淹至再請行貝州之變文彥博親自討賊乞於時望近臣中擇才略謀慮可以任重致遠者或畀上流或委方面習知邊防利害地形險阨中外軍

民亦孚其恩信。然其威名天下無事。則取風迹顯著。不
次除拜。以尊朝廷。邊鄙有警。則任以重寄。俾制方面。出
將入相。何所不可。上嘉獎曰。如卿言。可謂盡用人之道
矣。行太常丞。進秘書郎。提舉江東茶鹽。召爲戶部員外
郎。尋除直秘閣。兩浙路轉運判官。升副使。浙東濱海之
田。以旱涉告。常平儲蓄不足。黼捐漕計。代之。毘陵飢。民
取糠粃雜草根以充食。郡縣不以聞。黼取民食以進。乞
捐僧牒緡錢賑濟。所全活甚衆。除中書門下檢正諸房
公事。守殿中侍御史。歷遷刑部右侍郎。以論劾奉祠卒。

元 凡一人

上虞尹林希元

林希元台州人博學能文章由翰林應奉出尹上虞在官庶介妻子恒有飢色人不能堪希元處之泰如也白馬湖最關水利每爲豪民所侵乃定墾田數湖始復舊旱潦咸賴之重建明倫堂續修邑志嘗請立箕子廟於遼東祀董仲舒於廟庭皆有功名教者卒於官貧不能飲邑士爲營葬之所著有長林存稿

明一 共二十七人

監察御史張尹誠純誠

張純誠字尹誠寧海人洪武初由和州同知擢江南提
刑行部至婺源見黃山之民病於茶鹽欲奏罷之其使
執不可純誠曰國家新立正當損山澤之利以與民使
天下知吾輕財而愛民也奈何浚民自殖以沮天下向
化之心哉辯難數四使不能奪卒奏免之未幾陞監察
御史與修律令定官制持議勁正中外肅然一日乞歸
省上因令招集鄉郡之舊爲方氏兵者純誠愀然曰
臣事陛下十年無絲毫惠利及鄉里今歸省而首招

集鄉里子弟以爲兵父老其謂臣何上動容稱歎而止山東初定欲擇一管塩筴者而難其人上曰前張純誠奏免黃山茶稅不可邪遂以爲長蘆運使未至官而卒

監察御史何同

何同衢之龍游人洪武中由人才起家歷官監察御史諷朴寬厚鞠問獄情每存欽卹嘗曰求生於死者不得則生者與死者皆無憾矣立朝正大風紀肅清士論重之

蓬州知州金士琬

金絃字士琬開化人洪武初舉順天鄉試歷官四川蓬州知州愛民守已不以邊遠鄙其民民亦甚愛之不啻子弟之於父兄也尤載政成清操如一日給由便歸田里不赴部家居環堵蕭然日以詩文自娛而周窮恤困視其力之所能恒汲汲焉同宗一門疾死二十餘人無敢視者絃獨周旋其間親視飯含爲之殯埋其於不義若或免已身死之日至無以爲殯說者以爲真孝廉

左副都御史夏廷簡題

夏迪字廷簡，台州人。洪武丁卯，以書經中鄉試。春宮弗第，入內監讀書。庚午，試政於刑部，授溧陽丞。邑年丁水，涉逋賦數夥，其糧里有鬻妻貨子，願償所逋，猶未能集。甚至有喪身亡家者。迪閱而思之，乃勸借於殷實巨家，得米十萬七千餘石，先足官賦，次贖其子女，以歸人咸德之。調福建懷安丞，一治以溧陽之政。薦陞大理左寺副，廷中稱平。文皇卽位，陞吏部文選司員外郎，轉郎中。百司官吏舉得其人名達。仁皇試以太極論褒美，有嘉，尋拜河南參政。有姪其能者，父訐陰私，繫獄聽勘。

仁皇知其寃請命於行在宥之起授兵部司務四日召至文華殿面諭清理戶部田糧卽擢爲浙江司郎中進以浙人辭復諭之曰爾不作樊何辭爲乃叩頭奉命不數日清理以聞拜四川左叅政時朝廷遣使採辦木植踰越歲時厲氣盛行民多橫夭迺因入覲備陳民艱蒙特賜寬免軍民歡聲如雷母憂服闋調江西左叅政仁皇卽位召拜南京都察院左副都御史領詔督常州府稅先是常困於水災迺至令郡守等勘實徧召鄉之巨室諄切諭之發倉撥粟得米六萬餘斛以克賑濟公

私輟以給助丙午二月忽遘疾卒於金臺年六十一迺
居官三十年布衣蕭然妻子有不足之態惟竭力拓基
構祠以祀祖宗制度儀物類依文公家禮又割父松谷
所遺田五十畝以克祭田凡四時先隴等祭量入爲出
著時思儀略一篇以識之子孫至今世守云

江西按察司僉事馮本清

馮本清餘姚人膺貢入太學授湖廣道監察御史永樂
甲申奉勅撫種松常三府長洲有宿盜聚至數百人督
兵禽之監司請梟論大辟本清不可奏誅其魁餘差爲

五等皆得不死。上海行臺有淫祠爲孽。前御史輒避不居。本清入而毀之。妖遂息。他如按賊吏振士風。善政尤著。再巡四川。甘肅亦如之。庚寅。扈從北狩。歸績最擢。福建按察司僉事。分巡漳泉諸府。兼海道。庭無留案。惟死獄。必審平。反甚衆。府歲輸香貨百萬。而非其產。本清請半折鈔。以甦民力。建寧大水。溺者爭附槎木。蔽川而下。本清聯百艘爲浮梁。截流抹之。活數千百人。時逋賦繁重。廷簡方面官。分道徵之。公得太平諸府。以民貧不忍督迫。善爲撫諭。民感泣爲之稱貸以輸。僅踰月而畢事。

宣德丁未改江西巡按饒信諸府與御史俞謙錄囚安仁方蒞事忽得風疾端坐而逝謙督官屬治棺歛歸其喪年六十其爲人孝謹庶直不苟爲趨避久且不變嘗自號曰介菴人亦以是稱之

禮部左侍郎章尚文

章敞字尚文會稽人永樂癸未以鄉書首薦登進士第選入翰林爲庶吉士與脩永樂大典授刑部主事時近京西山有盜肆劫掠逮捕數百人鞠之多不服敞察其寃惟拘其姦色異者一人餘悉遣出期明日復至同官

爭不可敵卒遣之明旦至如約後勘驗其人皆非盜而
一人瘁色異者卽盜也衆始服其明復有商夜宿都城
外何氏肆被掠商疑何欲訟之何不克自白乃訴於官
而自經死太宗皇帝聞其故命司捕者三日不得盜
抵死司捕者乃妄繫何隣二十餘家別取楮幣如商之
數而以盜加之敝察其誣辨理之皆得釋宣德初歷遷
至禮部右侍郎奉詔往安南命黎利權署國事暨宣詔
利遣人白相見禮敝語之曰吾奉詔至爾蓋小國一酋
長能盡禮於使者卽所以尊敬朝廷何用白爲卽趨拜

坐於下，令所親給侍左右，數爲巧媚辭，欲眩以聲色，敵正色待之，終不爲動。及還，餽贐珍異，一無所受。利乃以所餽物付貢使致之，且戒關吏俟使者出，卽閉關。敵度知之，及關，親閱所貢方物，餘悉封付關吏，及利死，敵復奉命令利子麟權署國事。關吏見曰：「此天使前却金者。」比還，却贐如初。正統元年，平陽王復封晉，卽以故護衛官軍田廬爲請，敵受命往理之。至則較其軍數量，以田廬與之餘，給於民。王不悅，敵啟曰：「國中先三衛，今止一千戶，所以三衛田廬而歸一所之人，得毋過乎？且朝廷

以藩屏望。殿下國內軍民宜均愛之。庶副皇上至公之意。王悟曰。使方面諸官早有此言。吾亦豈敢上煩朝廷還奏。上嘉之。遷左侍郎。敕蒞政。思慮精審。防範周密。以國家統理天下既久。典禮品式有因革輕重之殊。或隨時損益。有先後矛盾之異。而吏胥亦稍緣此爲姦。遂自尚書取國初至今凡所行條格籍記之付四司。使得參酌而行。以是事獲適宜。奸弊頓革。未幾卒於位。年六十有二。計間遣官諭祭。命有司治喪。給傳歸葬。敕質性溫厚。待人接物。意氣豁然。矧貧濟難。尤克盡心。問學

優裕爲文簡暢所著有質庵稿藏於家

副都御史王景陽暹

王暹字景陽山陰人登永樂戊戌進士選翰林院庶吉士進元夕詩獲寶楮之賜授刑部主事陞員外郎薦擢河南按察司副使調陝西督儲有勞遷布政司右布政奉勅勸濟得水一百五十餘萬石民用不飢以母憂去吏民請留上遣官邀詣途奪情復任九載秩滿應遷朝論難其代俾守原職以慰陝民賜誥命加贈三代如其官正統己巳胡馬飲蘆溝京師戒嚴收用老成以護

根本召還還陞都察院右副都御史守正陽門時遠邇
軍民驚避聚城下惶惶待斃還啟西直門悉放入賴以
存活者萬計尋奉安撫順天等處奏罷被虜諸郡縣歲
課物料民安之改巡撫河南湖廣兼修築沙灣遂奏定
修河用工次第自黑洋山抵蕭縣每十里置舖專人提
督修治仍乞減免濟南兗州科差以甦民困未幾陞右
副都御史奉勅賑濟河南徐州飢民因奏開封等府州
縣災傷五十一處乞蠲該年夏稅之半又慮黃河水勢
漸及汴城築隄四十餘里捍其外城用不圯年纔六十

以災異上疏自劾乞罷歸田里杜門謝客優游林下十餘年而歿享年七十所著有慎菴集四十卷藏於家

兵部左侍郎鄭文樞辰

鄭辰字文樞淳安人永樂中進士授監察御史江西福安民有告謀逆事辰往廉之得其誣狀抵以罪谷庶人有異謀遣辰陰察其虛實比還太宗召至便殿親詢之辰語其不軌之狀甚悉尋擢江西按察使賜楮幣馳傳之任潞州盜起朝廷欲遣兵往討辰謂此貧民懼徭役竄入山谷間者不宜加兵乃躬往撫諭遂皆安業召

陞工部左侍郎奉勅考察雲南四川方面官還濬漕河有言宜自大名開渠通衛河以便行舟辰以勞民奏罷之陞兵部左侍郎歷九載以疾致仕卒

刑部主事管原理思易

管思易字原理鄞人永樂乙未進士授刑部主事持法平恕奉命使湖廣辨疑獄釋繫囚全活甚衆衡陽有少婦秦氏孀姑欲嫁之不聽有隣少年馮小二欲挑之以姑在不得間因計毒其姑而婦遂陷於辟思易至郡境夜夢老婦繫一馬泣訴於車前曰馬實殺我非婦也比

至郡以獄上求馬姓者不得則視隣右人贖刺之有馮
小二目將無是乎遽呼訊之卽立承婦遂得釋歸州同
知孟紹芳盜庫銀二千許弃官去司府以孟巨璫姻不
敢問乃囚十數吏郝洪等思易知其冤卽條奏之徑執
孟抵法而釋洪等已而居內艱起復仍前職時有獄王
瑄罪不應死尚書吳中以私憾論死思易爭之中不聽
竟殺之乃歎咤憤惋發疾卒思易平生勵志清約不苟
得赴公車時道臨清見遺陌錢守以待失者還之見者
欽異性至孝友母喪致毀足不踰戶限所人僚悉以供

伯氏與舊子與人交不爲依阿人皆嚴之

鞏昌府知府戴彥廣浩

子樹附

戴浩字彥廣鄞人永樂庚子舉人初判東昌管河道時有麥商舟覆拯其屍殞之貯遺金數百鎰於公所據引移商屬盡給之九載遷守雷州州故並海鹵病稼乃築隄以捍風潮民歌其德又改鞏昌歲飢矯發邊儲三萬七千餘石賑之監司語以法浩曰法固知之如民飢何若以一人活千萬人卽死固將安之乃上疏自劾朝廷優詔原焉天順改元乞骸骨鞏昌民相率走闕下奏留

之復任尋循例致仕凡二十餘年躬行德誼表率宗族
置義冢以瘞里之無歸者置義塾以教羣姓子弟終其
身不衰壽九十三而卒治善吟咏詞翰戲墨多爲人所
珍有默庵詩稿藏於家季子楨教諭以學行稱孫鰲鯨
鰲鰲相繼舉進士至顯官皆楨子也人以爲積德之報

湖廣叅議周宗武文

周文宇宗武仁和人永樂甲申進士授翰林庶吉士時
修永樂大典天下文學之士咸在館局獨雅推文有纂
述才聲稱赫起然亦以是不得終在史館去爲兵部主

事稍遷員外郎轉湖廣參議黃州歲大侵流移滿野道
殍相望文多方籌畫以濟又盡捐俸入以倡富民分粟
先拯其急及事聞得請亟發倉賑濟全活甚衆無何以
疾卒部民擁道哀號至爲服以送歸櫬者數萬人

湖廣巡撫蔡廷予錫

蔡錫字廷予鄞人中永樂癸卯鄉試入貢監以學行選
授兵科給事中彈劾不避權貴陞知泉州府廉慎勤敏
孜孜爲民樹長書奏除洛陽東山大橋三鎮戍兵公私
便之尤善摘伏境無竊盜時洛陽橋圯發故石有刻文

云石頭腐爛蔡公再來橋故宋太守蔡襄所建而錫適以守至遂捐俸修之橋故跨海潮日奔濤施工極難錫甚患之計無所出乃爲文檄海神募賁批者皆莫應忽一醉卒踉蹌而前曰我能往乃飲酒大醉自沒於海若有神接之者遂得批以還復於錫上有一醋字錫妄意曰得非八月二十一日耶刻以是日興工潮不至者旬日橋遂迄工更其名爲萬安民德之立祠其傍配享端明陞山東副使奉勅叅贊宣府總兵軍務以功陞順天府丞服闋改應天秩滿陞大理寺卿奉勅巡撫湖廣大

飢設法賑濟賴全活者數萬家尋乞骸骨歸蕭然圖書不持一物囊無買山之資至饋粥不具逍遙吟諷宴如也有賀山稿行於世

禮部郎中蔣廷暉曾祖鑑子宏附

蔣暉字廷暉錢塘人曾祖鑑元鄉貢爲池陽掾民有以飢餓去爲盜主者欲盡置於法鑑爭之不得乃陳於轉運達於朝全活者三十二人暉自幼好學博涉子史精楷法以薦入翰林授中書舍人陞禮部郎中兼侍書引年致仕歸壽八十八卒暉在官四十餘年小心謹密出

入禁閤未嘗有過愛重友道一時同事貧不能濟者居
付似食之有歿者復爲殯以歸其喪且爲經紀其後而
與妻子不免寒餓弗恤也黃養正姚震咸有學行在
嗣成中暉力言於朝薦起之皆至顯官暉平生利惠人
庶矣未嘗有所責報亦未嘗以語人故人咸以長者稱
之書法蒼勁而結體森嚴尤善題署子宏卒官吏部郎
中

安福簿詹景威

詹景威松陽人尚氣節敦行誼鄉舉中乙科訓晉江試

心作人多登仕版將擢風紀以上封事忤當路左遷夏
邑幕邑民流亡將謀不軌威至卑弱直入諭以義毀崇
復業籍得民里七號新官里尋以艱歸起補諸城青齊
久旱蝗官稅積十二年不能入民竄過半乃抗章乞貸
設法捕蝗歲得半稔民以不飢竄者悉還長令政稍不
公卽正色請改陞安福簿令散其才竊勸曰君所至皆
得民少順上得大用矣威曰吾強仕所以報君親行
已學也若屈節取寵不能乃慨時乞歸適憲臣交章薦
之皆弗顧

右副都御史盧仲思廕

盧廕字仲思東陽人登永樂辛丑進士宣德丙午拜監察御史廕正明決不爲利害所惑嘗按治於遼囚有所免者十三人皆金川衛卒與卒長也自言謂知山東民運布花多奸弊因合謀執之弗克執反被誣以強盜獄成且二年矣廕察其實寃辨出之十三人者得不死特陞都察院右僉都御史巡撫大同宣府奉勅以行時北虜入貢勢頗張廕慮其包藏禍心爲後患乃上疏乞修武備以防不虞議者避之辛酉改命叅贊寧夏軍務寧

夏孤懸境外，尤爲重鎮。唐行視險要，築臨沙與武二城，列置烽候十餘所，益廣屯種，繕甲兵，較士馬，以固邊備。初，授田屯軍，不計腴瘠，衆苦於輸租久矣。唐視瘠者求閒田，益之；因教以墾闢、灌溉之法，不數月，田皆膏腴。耕者利焉。間被水災，輒復具奏蠲其稅，舊設儒學訓武生。春秋二丁，恒歛衆錢以祭，唐懼其貢且擾也，因規田二十餘頃，請於朝，以軍餘佃之。歲收租入爲常祀費。陞右副都御史。是秋，虜寇大同。如唐慮時，唐在寧夏以有備，故無患。特賜白金文綺，以嘉勞之。年六十一，卽乞骸骨。

歸家居十有三年而後卒。肅爲人天姿淳美，孝友忠厚，人無間言。居喪奉祭，必遵古禮。若修家譜、置祭田，凡義所當爲者，必勇爲之。至於聲色勢利，視之若仇。居官三十餘年，家無餘貲，其自奉雖儉薄，而於待賓客周貧困，未嘗不豐且厚也。人以是賢之。

刑部尚書陸廷玉瑜

陸瑜字廷玉，鄞人。登宣德癸丑進士，授刑部主事。陸員外郎慮囚淮揚諸郡，多所平反，釋繫囚三百餘人。從末減者以十百數。比復命，陸郎中出爲山東右布政使，適

齊魯大侵民相鬪取富人粟監司坐劫罪瑜曰民苦飢
取粟延殘喘以免道殣耳卽道殣免而復殺之忍乎竟
從輕擬已轉左天順二年刑部尚書闕屢推上不獲俞
旨特命瑜遂下詔徵拜及陛謝上語左右曰刑部職
司民命迺今得人矣時錦衣衛指揮門達怙寵作威弘
農衛卒誣奏指揮李斌不軌事下達鞫之達鍛煉以逆
狀具獄會廷議瑜獨明其冤達怒語侵瑜瑜曰瑜所執
者祖宗之法奈何枉人至族邪達譖瑜私出反者罪
上不聽止誅斌已而達敗言者欲置之死李賢質於瑜

瑜曰達典制獄任情輕重不爲無罪然比紀綱馬順則有間矣達卒得不死曾欽之異謀也武夫有希功者執欽佃人數百輩爲逆黨瑜曰欽謀倉卒諸佃相去或數百里安得一旦與謀乎竟得不坐瑜爲尚書十八年明於法比練習國家典故屢辨滯獄人以不寃致仕歸闕門養重十有七年卒謚康僖何喬新志其墓有云其明習法令如漢薛瑄而無煩碎之失其練達典章如漢胡廣而無與世浮沉之譏其能斷大事如唐姚崇而挾數歷諫有不爲也世以爲實錄

刑部尚書薛廷器希璉

薛希璉字廷器，括之麗水人。領永樂癸卯鄉薦，成宣德五年進士，拜貴州道監察御史。按治河南，歷遷刑部右侍郎。時畿內廣平等府旱且蝗，命希璉往視。至則黥貪吏，蠲逋負，弛徵輸，嚴令捕蝗。蝗乃息。是月大雨者三苗，稿復蘇，民以不流。陞巡撫直隸保定淮安一十二府事。有便不便者，施罷不俟日。當是時，閩寇鄧茂七作亂，師征踰年始克之。而郡縣凋弊尤甚，移希璉鎮守其地，盡心撫輯，人民稍安。旣而殘寇羅丕復起，希璉請調兵討。

之然知賊黨迫脅者衆可以說解也乃遣人抵其壘論之曰若等皆良民特誑誤從賊耳能自新者待以不死不然將殄滅之無遺育不日降者數萬計先是有逃入海者聞之亦棄兵自縛詣麾下希璉悉縱之使歸田里其負固不服者縱兵擊之擒斬殆盡閩寇乃平以功陞刑部尚書奉命考察山東罷黜貪鄙者二百五十餘人時山東久不雨飛蝗滿野食黍果無遺種希璉禱於泰山雨而蝗息經營賑貸活飢民百八十餘萬口賜誥進資德大夫正治上卿天順改元上簡賢圖治任希璉

以南京刑部尚書卒於邸時年六十建爲人忠厚端謹
氣貌溫雅居官謙約不以貴勢驕人御衆寬而有制用
兵持刑不殺無辜尤諸練政務前後奏疏百餘章皆憂
國愛民之計至於處大事決大議一言而定人莫能測
其際可謂有德有烈者矣

副都御史朱廷璧瑄

朱瑄字廷璧鄞人以進士釋褐授工部主事督修通州
倉漕舟附甓至故事輸紙乃得納甓積紙至鉅萬皆克
私橐瑄悉罷之貧不能自給至鬻釀以供朝夕釀或不

售卽爨不舉火已而改官繕監稅蕪湖蕪湖故利數少
乾沒可坐致千萬而瑄獨不一染乃大弛商征而稅入
倍溢常數已又改兵部進員外郎時陝西大飢人相食
奉命出賑鳳翔稽戶定籍惠利惟均其鼠竊而囚繫者
原之曰此偷活一朝之命豈故乎乃又給穀種牛具課
民還耕所活凡六十萬有奇陞河南參議適旱蝗相仍
卽以行於鳳翔者推之進本司參政撫治流民歸遁逃
劫貪暴戢豪強治決河不遺餘力陞本省右布政使進
副都御史巡撫南京興學造士備荒恤災罔不盡力過

瘁而疾作。遂請告以歸。瑄平生義利之介最嚴。有齒及賕賂者。輒嘖然變色。敗歷中外幾四十年。而家無餘羨。器用陶匏。內子無金珠之飾。郡邑論其匱乏。嘗以薪水餉之一。無所受。會歲飢。家且絕食。都御史王璟適奉命賑濟。餉之米四十石。瑄謝曰。飢民則有之。寧有飢官乎。妻子竊尤之。當道嘗檄樹綽楔固辭曰。煩官錢用民力。死不忍爲也。終其身請託不至於耳。貪墨者見卽赧然。童兒有戲以紙錢爲貨者。人止之曰。無以爲也。朱都堂不愛真錢。况假錢乎。其爲市井人所知信若此。卒之日。

貧無以爲殮至賁棺於市今其子孫斃斃田牧至無以爲家說者謂天道無知

刑部右侍郎金縉卿紳

金紳字縉卿錢塘人洪武初以閭右實京師遂家金陵之上元景泰癸酉中應天鄉試明年登進士第由庶吉士陞刑科給事中踰年英廟復辟勵精求治紳適掌科數召對所以寵待甚至上嘗誚一二大臣晡時趣具彈文卽援筆而就詞甚切當上覽而悅之憲宗嗣位進都給事中首率同列諭都指揮門達竊弄威柄

罪繼令議廷中言都御史王竑剛毅直諒可任大事宜
卽召用一時達被遠謫而竑起爲兵部尚書紳於是益
以言責自盡嘗陳時政八事悉見採納陞南京大理少
卿時紳年三十餘或意紳法比容有未習姑以難事試
之紳剖決無滯雖老吏不能過乃大敬服居恒嘗曰獄
者人命所繫極楚之下何求不得彼不能伸於法司而
求伸於我我又不爲之理何用廷評爲故凡經紳平允
者輒無異詞在大理九年如一日秩滿陞南京刑部右
侍郎月躬視獄者再每戒飭其屬俾無法外施刑故事

霜降後會大臣審錄重囚必先召所屬郎署反覆詳審有可矜疑者必具錄之至期對衆言某可矜某可疑因而得生者甚衆戊戌江西荒歉上特簡紳往巡視許以便宜行事紳委藩臬二司官定計受畫俾各泄所部督責其屬勸興發以賑而凡可以寬民力裕民財節財用弭盜賊者無不竭其心力在江右幾二年凡得白金以兩計者十有七萬米穀以石計者幾二十萬所活軍民以口計者毋慮百六七十萬江西十三郡之民賴紳以字未幾得疾卒年僅四十有九紳性簡靜慎交游且

官故鄉親舊有以私謁者，峻拒之。始雖不樂，終莫不信。服其公，侍父家居者二十年，以公務兼孝養。時人崇之。平生儉約，一無所好，惟好讀書，自號心雪。所著有心雪稿、青瑣獻納稿若干卷，藏於家。

應天府尹魯懋功崇志

魯崇志，字懋功，天台人。父穆累官都察院右僉都御史，風望重一時。崇志兒時聞家學，已屹然有自立之志。景泰庚午，領鄉薦，邑令贐以白金，力辭弗受。甲戌成進士，授吏科給事中。彈擊不避權要。天順初，奉勅賞邊防範。

嚴密下無敢欺。戍者皆蒙實惠。時武臣曹欽跋扈。舉兵犯關。崇志適待漏關下。變起倉卒。衛士未有應者。崇志卽躍馬張空拳。與欽格鬥。俄大軍合。而欽就誅。擢南太僕寺少卿。徧歷州郡。釐其宿弊。傳以新法。不數年。馬遂蕃息。而民咸稱便。以最陞應天府尹。先是七邑民阻飢。逋賦數萬石。崇志爲勸分以代之輸。而以次賑其貧者。中人王徽怙勢。以鹽二萬引。懇鬻以規重利。崇志厲色拒之。蓋崇志急於爲民。雖舉世所趨。不難出身以當其衝。慨然有烈士丈夫之風。卒年六十有六。君子哭於位。小

人哭於野爲之罷市者三日論者以爲古之遺愛

董如魯慧

董慧字如魯海寧之泉山人世稱儒者慧自少至長孝弟剛介得於家法務實去華不事章句内外子弟有失道者誘掖訓誨教以事親敬長之節善者有賴不善者有警所居不過數椽題其正寢曰終慕獨留意於祠堂器制精備凡事事非齋戒不入朝夕省謁終其身不間置義田二百畝以贍三族勸節田六十畝以給族人之孤寡周急田三百五十畝以備里社之凶荒月望給貧

病者人米一斗。死者與之棺。無所歸者。葬之。義冢。又建橋以利涉。鑿井以濟行路。景泰後。數出穀賑飢。至五千石。屢授冠帶。皆力辭。嘗南至浦江。義門鄭氏得其家範。文公禮梓於家。北至姑蘓。造范文正公家廟。得其遺文以歸。業欲趨關里。嶽國瞻挹遺風。老不果行。居常念念將卒。語其子謙曰。吾強力爲善。禮下賢士大夫。勤一世不敢少自肆者。蓋欲保家族以成汝兄弟也。家範數十條。遺書千卷。勸節周急。田數百畝。吾志與事盡在於此。吾死後。汝宜展親益惠。加於故常。毋徒過庸。不篤以媿。

亡人吾日瞑矣。語畢而卒。年七十有九。謙遵治命。遽散米三百石。周親近。以表事始。

都御史夏宗成墳

夏墳字宗成。天台人。景泰中。以進士起家。爲御史。出按廣西。首除姦貪。息盜賊。通錢幣。民皆便之。尋歷福建。興革黜陟。一如廣西時。而其於江西也。風裁益甚。中貴人葉達怙勢。衆莫之敢撓。墳累章劾之。落其權。天順初。以薦擢廣東按察使。廣東有師旅之命。守陴兵不足。取之民。墳曰。誰獨無父母妻子。而使人舍其親。以捍人之親。

奚罪哉民皆揮涕去曰公活我旣凱旋都御史韓雍將
修爲燕樂頃亟止之曰出師以爲民也今師以病民可
乎雍覩而止成化改元擢布政使尋徙江西未幾進都
察院右副都御史巡撫四川四川夷獠歲多劇寇頃至
立互知會捕法賊得以不熾古州苗以萬數徙居爛土
幾年矣有仇播州宣慰者誣爲盜引兵將逐之頃亟奏
曰制馭苗夷當如虎狼其靜也若奔而不使懷疑其動
也必馬之而不使爲患今靜而故使之動何哉松叅將
孟兵頃曰將不在兵兵不在衆乃簡精銳四千八百

人往更之而一無所增、未幾以言事不合輒引疾歸、章三四上、上留之、卒不可得、曰、知足不辱、吾豈敢自負、吾心及歸、杜門養親、有造之者、雖數不報、曰、吾以病故、弃國事、何能復修主客禮、卒年五十有九、

太僕寺少卿章用輝瑄

章瑄字用輝、會稽人、景泰中進士、授職方主事、出守山海關、時中貴魏榮領神鎗、縱所部京校、假冒試習、侵關事、後府舍人王延倚藉宮掖、得管押戍卒、徃徃迫淫其婦、攫其囊、且盡、瑄並奏、悉置諸法、御馬都監指揮脫人

赤有寵於英廟。命使朝鮮而無關符。瑄持之不奉詔。脫馳奏。上震怒。械繫闕下。言官論救。乃釋。尋遷車駕郎中。進遼東行太僕寺少卿。諸番貢馬入境。多爲闕帥所擅。瑄請歲遣官閱所貢馬於各邊。自是歲得良馬無筭於邊。檄建學以教列校子弟。遼士始知禮義。尋乞歸。所著有竹莊集四十卷。

貴州布政使唐質夫彬

唐彬字質夫山陰人。初從會稽章瑄學。未幾彬中式。與瑄聯榜。會試復然。及拜御史南歸。瑄以喪未受官。彬執

禮如布衣時而稠人廣坐中有所顧語輒掩口應對時
以爲師弟子之禮復見古人在官持法明審數考稱職
時總兵石亨連衡內豎曹吉祥權侂人主編修岳正御
史楊瑄等露章彈劾悉竄於邊亨由此滋橫陰蓄異志
彬復率同列抗疏論之上心善其言而慮亨猝爲變
姑調諸御史於外未幾亨敗復彬官巡按關陝所至風
望凜然尋出爲廣東按察副使會兩廣賊起上命兩
都御史討之民多脅從於賊賊已去民懼誅不降彬持
節往諭以恩信民涕泣相率歸附改山東副使齊地飢

人相食撫臣請賑未報彬爲捐俸倡同列及王府得粟千斛爲粥以食餓者所全活甚衆明年拜福建按察使再遷貴州左布政使未赴而卒家無餘貲惟書數十篋而已

工部侍郎李時升堂

李堂字時升鄆人弱冠登成化丁未進士第授工部屯田司主事差監稅蕪湖時坐貴宋昂質緣內批指取御木沮遏商人意將漁獵堂務從寬減刮剔宿蠹照上年解額存留美餘籍記以寬後解昂一不得染指自是中

貴不復踵差。陞管繕司員外郎。進郎中。清寧宮災。手
詔營建。堂議請發內帑。免徵天下計。以蘇民困。工成。減
原計之半。存積動支之數。什三。每言曰。所規聚歛不如
盜臣。欲免聚歛。先革盜欺。故諸大役。旣寬坐派。而存積
不貲。以備急乏。出入勾稽。精詳嚴密。平日窟穴其中者。
皆束手無所措。陞太常寺少卿。進應天府丞。時建平縣
飢。吳廣五等聚眾。假以稱貸。搶掠間。有相守望。禦侮殺
賊。訛言洗勦。幾激大變。堂卑駟諭。以禍福。眾感泣。執獻
渠魁。以徇。脅從者悉遣歸農。當道避之。以口舌代甲兵。

可屬大事。御史韓宣奏宜超遷永弼以旌賢。伐奉命歷
試南京光祿寺卿。進南都察院左僉都御史。勅整江南
北。未幾陞工部右侍郎。時河患告急。勅兼左僉都御史
總理修濬。抵官縣。因已集人夫築長堤。自大名至沛縣
三百餘里。又自滎澤抵永城縣。疏通水道以防潰決。未
幾回京。上疏引疾。詔許乘傳還鄉。痊日。有司勸駕。蓋異
數也。高蹈十餘年。閉門著述。有正學類編十五卷。四明
文獻志十卷。梓行於時。而董山遺稿若干卷。藏之家。
兩浙名賢錄卷之三十二終